

滄浪亭新志卷三

吳縣吟秋蔣瀚澄輯

集詩附賦

郡侯訪予於滄浪亭因而高會翌日以一章謝之 蘇舜欽子美

荒亭俗少遊遷客心自愛繞亭植梧竹私心亦有待昨朝十騎來趨趨擁林外
水禽駭笳鼓野老瞻車蓋公餘喜靜境賓主因高會跋石已行廚臨流聊褫帶
優遊鄙情通放曠末禮殺酒醇引易醢肉美舉必嘖千蹠恣食雞二螯時把蟹
解顏閒善謔傾耳得嘉話暮夜歡未厭徘徊意將再跋已見瞻騰跨鞍極倒載
明日尙狂醒嘉貺不違拜

滄浪懷貫之

滄浪獨步亦無悰聊上危臺四望中秋色入林紅黯淡日光穿竹翠玲瓏酒徒
漂落風前燕詩社凋零霜後桐君又暨來還徑去醉吟誰復伴衰翁

滄浪亭

一徑抱幽山居然城市間高軒面曲水修竹慰愁顏迹與豺狼遠心隨魚鳥閒

滄浪亭新志 卷三 集詩

吾甘老此境無暇事機關

獨步遊滄浪亭

花枝低欹草色齊不可騎入步是宜時時攜酒祇獨往醉倒惟有春風知

初晴遊滄浪亭

夜雨連明春水生嬌雲濃暖弄微晴簾虛日薄花竹靜時有乳鳩相對鳴

滄浪觀魚

瑟瑟清波見戲鱗浮沈追逐巧相親我嗟不及羣魚樂虛作人間半世人

滄浪靜吟

獨繞虛亭步石矸靜中情味世無雙山蟬帶響穿疏戶野蔓盤青入破窗二子
逢時猶死餓三閭遭逐便沈江我今飽食高眠臥惟恨醇醪不滿缸

滄浪亭

歐陽修永叔

子美寄我滄浪吟邀我共作一作賦滄浪篇滄浪有景不可到使我東望心悠然

荒灣野水氣象古高林翠阜相回環新篁抽笋添夏影一作景老枿亂發爭春妍

水禽閒暇事高格山鳥日夕相啾喧不知此地幾興廢仰視喬木皆蒼煙堪嗟
人迹到不遠雖有來路曾無緣窮奇極怪誰似子搜索幽隱探神仙初尋一逕
入蒙密豁目異境無窮邊風高月白最宜夜一片瑩淨鋪瓊田清光不辨水與
月但見空碧涵漪漣一本有姑蘇臺邊人響絕清風明月本無價可惜祇賣四
萬錢又疑此境一作景天乞與壯士憔悴天應憐鴟夷古亦有獨往江湖波濤渺
翻天崎嶇世路欲脫去反以身試蛟龍淵豈如扁舟任飄兀紅蕖綠浪搖醉眠
丈夫身在豈長棄新詩美酒聊窮年雖然不許俗客到莫惜佳句人間傳

滄浪亭

梅堯臣聖俞

聞買滄浪水遂作滄浪人置身滄浪上日與滄浪親宜曰滄浪叟老向滄浪濱
滄浪何處是洞庭相與鄰竹樹種已合魚蟹時可緝春羹菘白菘夏鼎烹紫蓴
黃柑摘霜晚香稻炊玉新行吟招隱詩懶戴醉巾憂患兩都忘還往誰與頻
昨得滁陽書語彼事頗真曩子初去國我勉勿迷津四方不可之中土百事淳
今子居所樂豈不遠埃塵被髮異秦伯結客非春申莫與吳俗尙吳俗多文身

滄浪亭新志

卷三 集詩

二

蛟龍刺兩股未變此遺民讀書本爲道不計賤與貧當須化閭里庶使禮義臻

滄浪亭

胡宿武平

竄逐本無罪羈窮向此忘野煙含悵望落日落滄浪亂草荒來綠幽蘭死亦香
楚魂招不得秋色似瀟湘

滄浪亭

胡程德輝

昔聞滄浪亭未濯滄浪水先賢眇遺跡壯觀一何侈飛橋跨木末巨浸折胡壘
糟牀行萬甕繚牆周數里廢興固在天庶用觀物理緬懷嘉祐世周道平如砥
相君賢相君子美東南美如何一網盡禍豈在故紙青蠅變白黑作俑茲焉始
所存醉翁文垂耀信百世無忘角弓詠嘉樹猶仰止同來二三子感歎咸坐起
縹緲醕新汲毀譽均一洗忽逢醒狂翁一別垂二紀雋哉老益壯論事方切齒
我欲裂絳幔推着明光裏安得上天風吹落君王耳

觀滄浪亭石感而有作

劉敬

蘇君在朝人不知蘇君既沒人悲之流風遺書見稱道高文大句爭提撕壁間

草隸亦不置剝苔堆立無棄遺乃知死不與人共利害而後不爲時所擬滄浪亭空卉木老古石蒼蒼顏色好無脛猶能千里來致身忽在都門道帝都王侯好事多相看自悔取不早君不見吳興長史春欄衫閉門抱恨長枯槁

草庵紀遊詩并引

沈 周啓南

弘治十年八月十七日余有役於城來寓草庵爲始遊也庵名大雲前有吉草庵者居之遂譌爲結草庵庵近南城竹樹叢邃極類村落間隔岸望之地浸一水中其水從葑溪而西過長洲縣治由支港稍南折而東復南衍至庵左流入環後如帶匯前爲池其勢縈互深曲如行螺殼中池廣十畝名放生中有兩石塔一藏四大部經目一藏寶曇和尚舍利東西二小洲楢而方浮汨塔下猶筆硯相倚東洲南次通一橋惟獨木板耳過洲復接一木橋人行側足慄股徹橋若與世絕自此達主僧茂公房房踞東偏中有佛殿瓦土岡延四十丈高逾三丈上有古栝喬然十尋其枝骹髣深翠數百年物西亦有房與東房等實茂之姪禎公分棲處也山空水流人境俱寂宜爲修禪讀書之地勝國時有斷崖和

浪滄亭新志

卷三 集詩

三

尙肇業於此繼之寶曇曇傳爲斷崖轉生皆了悟之人地理家謂四獸俱全風氣藏鬱以是觀之吳城諸蘭若莫之及矣是夕宿西小寮紙牕月色耿耿無寐因得五字律一首

塵海嵌佛地迴塘獨木梁不容人跬步宛在水中央僧定兀蒲坐鳥嘯空竹房喬然雙石塔和月浸滄浪

滄浪池上

文徵明衡山

楊柳陰陰十畝塘昔人曾此詠滄浪春風依舊吹芳杜陳迹無多半夕陽積雨經時荒渚斷跳魚一聚晚波涼渺然詩思江湖近便欲相攜上野航

贈草庵瑛上人

昔人曾此詠滄浪流水依然帶野堂不見濯纓歌孺子空餘幽興屬支那性澄一碧秋雲朗心印千江夜月涼我欲相尋話空寂新波堪著野人航

大雲庵

蔡 羽九達

五載眠雲宅如浮海上舟斷梁僧渡熟疏竹鳥啼幽靜得觀魚樂閒堪學道謀

棹歌何處是城裏有滄洲

宿半野堂

滄浪池水漲桃花倒映南園雉堞斜古寺日長齋磬寂蒲圃相對演三車

滄浪亭用歐陽公韻

宋 犖牧仲

滄浪亭之水清且漣亭子結向滄浪邊滄浪之亭幾興廢滄浪之水今依然蘇州南園最幽曠池館創自武肅年厥後踵事非一姓轉眼變滅隨雲煙湖州長史昔貶謫愛此卜築將終焉輕舟野服恣嘯傲援琴命酒樂靜便長史作記歐公賦金鐘大鏞聲相宣斯亭遂與人不朽買得只用四萬錢曰余嚮往自弱歲今官於此嗟華顛手提孤篁徧探歷荒岡突兀臨長川方花古礎纏蔓草幾株喬木仍參天都官園空接斷壠蘄王廟在餘數椽老夫願此願修復勝事肯令他人專伐石作亭懸舊額衡山書爰飭祠宇肅豆籩蘄王英靈定來此會與長史相周旋觀魚處儼儼對鏡自勝軒小疑乘船隔城山色落衣袂步綺矯首聊遲延迴廊略約紛點綴管領風月凌平泉山僧野老共登眺中央旂旒卻勿前官

滄浪亭新志

卷三 集詩

四

熱心冷每自笑山林痼疾良難湔左司文章久避席白傳遊宴或比肩綿津滄

浪忽對舉西堂

尤悔庵

意厚語則偏吳人好事更好我任教畫作屏風傳

春日雨中同靳熊封兒至過滄浪亭二首

客有來南國亭因問北碕三人同策杖一雨恰霑衣溪水春全漲梅花濕不飛觀魚高韻在臨眺獨依依尙有蘄王廟難尋梅氏園迴廊聊聽雨小院一開尊繡嶺生遙慨熊封來自秦中述驪山甚悉滄浪且避喧胡爲君又去愁思滿川原

春晚過滄浪亭四絕句

遊魚雨後撇波聲宛轉溪橋拄杖行一段斜陽明野岸菜花時節正宜晴荒岡野水無人境亭外閒花次第開卻笑吳濃真好事送春都向此中來透迤石磴坐清陽數罷魚兒聽鳥吟五年百首姑蘇客一樣輕舟野服心虎邱歌板中秋夜元暮梅花驚蟄時不似此亭多古意到來先辦一篇詩

初冬過滄浪亭寄尤悔庵

滄浪亭畔刈稻了倚仗看山又此迴野水雁飛荷葉爛故鄉花送牡丹來經營

是處宦情別歌板古人生面開

時有滄浪亭傳奇

寄語西堂八十叟石欄點筆待追陪

雨後由滄浪亭過南禪寺慨然有作

寺爲白樂天舊遊地會貯文集寺中刻碑紀事

鳩鳴宿雨收日出輕煙泮寓公不暇懶踏屐滄浪畔沿波沙鳥明侵橋菜花亂
遠岫列空亭濃翠撲人面境幽環矚佳彷彿菜蕘汎偶謝纓倔羈頓使腰脚便
訪古過南禪徑曲苔紋徧老屋但鐘魚危樓尙霄漢鉢插零落桃龜舞呢喃燕
往者香山翁招攜此游宴風流不可及玉局舊曾歎忽忽數百年不異卯酉換
藏書委蔓草勝事逐激電惟餘千个竹清陰滿別院繫余景前修坐迨昏鴉返
叶生平鹵莽性擬就初地繕栴檀熱惱除餽粥殘僧伴還同老居士刻碑記發願

盤山青溝拙道人遠道見訪留住滄浪亭二首

青溝關就老煙霞瓢笠相過道路賒攜得一瓶豆苗菜來看三月牡丹花因緣
大事公能了潦倒麤官我自嗟好向滄浪亭子上梅檀香裏奉袈裟

經行斜日且觀魚黃鳥絲蠻入耳初接席金風舊亭長

竹懷人蠶尾老尙書亭

滄浪亭新志

卷三 集詩

五

春深玉版容參悟歲晚花宮待掃除拂子一揮仍小住空林明月暮鐘餘

宋漫堂中丞重修滄浪亭和歐陽公韻紀事

尤 侗 悔庵

家近蘇子滄浪亭嘗讀歐公滄浪篇歐公足跡未曾到詩中寫景何宛然城南
南園皆曠野荒村老寺交圍環憶昔錢王始創此錦衣歌舞爭華妍誰其繼之
章與蔡蠅營狗苟徒喧喧忠武勳名照天地將軍戰馬歸寒烟至今惟說蘇子
美才人獨結江山緣泉右往往留遺蹟追題姓字如神仙不知魂魄落何處春
秋風月仍無邊可惜草亭一塊土農夫日逐犁爲田滄浪清兮滄浪濁祇餘勺
水猶淪漣盤門冷僻車馬少僅通路約臆篷船古廟香爐休歇去庵僧燈火愁
無錢商邱中丞今詞伯竭來獻吊心相憐亟命匠人新土木儼然圖畫開青天
芻蕘往焉宜種樹漁父過此時臨淵西堂老翁聞之喜亦攜杖履思高眠桃花
塢中呼伯虎斗酒共醉羲皇年寄謝使君真好事綿津當與滄浪傳

滄浪六詠

滄浪亭

上有滄浪天下有滄浪水孤亭峙其中四虛曠無倚想見嶽奇人岸幘幽篁裏
自勝軒

清溪榜小舟還牽岸上住彷彿烟波中筆牀兼釣具長歌謝漁父任君鼓柁去
觀魚處

步履繞迴廊斷岸通略約高齋臨北窗小池才一勺明日春水來我亦同魚樂
南禪寺

莊嚴千佛堂藏經歲已久忍殿屢廢興常聽蒲牢吼卻笑白香山遺集竟何有
白公自書長慶集藏寺中

蕪王廟
韓王百戰罷墓木拱吳宮別存棲隱地廟食南城東至今陰雨夜石馬嘶秋風

南園
二月桃花開三月菜花盛遊人聯袂來啼鳥發春興我亦南園叟獨把長鑿柄

滄浪竹枝詞八首

滄浪亭新志 卷三 集詩

六

我輩原無四萬錢買山賴有令公賢宋家不占蘇家地雉兔芻蕘皆往焉

春日遊人遍踏歌茶坊酒肆一時多何當新製滄浪曲孺子歌殘漁父歌

吳濃好事太芒芒白地排當作戲場元墓虎邱人幾許早分一半到滄浪

滿堤楊柳綠如煙又鑿新涇可採蓮待得桃花三尺水端陽便好划龍船

數見行廚載酒過蘇公一斗不爲多土人更賽蕪王廟白馬金鎗唱楚歌

結草庵前石塔重孤亭聳峙似高峯詩人夜向滄浪宿聽盡南禪百八鐘

微聞開府撒鷓鈴倚徙青山看畫屏寄語歐公倘相訪此亭不讓醉翁亭

漫笑元之詩句狂只今誰數蔡元長醉鄉乞取吾何敢暫乞南園作睡鄉王元

他年我若功成後乞取南園作醉鄉之句後蔡京得之云堪笑當年王學士功名未就早題詩然後人笑蔡而不笑王也

滄浪亭用歐陽公韻

陳廷敬說巖

清水濯纓濁濯足竭來高詠滄浪篇歐子吟詩跡不到我今遊目亭儼然應知
構結存古制故令閱世如尋環喬木已疏閒弄影雜花交暎春爭妍冷梅苦竹
亦間發時有百舌來啾喧蘇君在日不得志精魂此地棲雲煙我生幸值休明

運不應與子相資緣嗟予賦性慕放誕一枕喜遇龜茲仙十洲三島不可望天
留老眼湖江邊公乎避讎如避寇雒陽豈無二傾田嵩邱萬古疊蒼翠洪河清
濟波淪漣賢妻孺子飽蔬食那肯浪用公紙錢惜哉與時自齷齪凶凶人怒天
須憐人生有命天所定屈申未了還聽天水清水濁源自異如金在沙玉在淵
鬱於生前昌厥後回頭萬事輸醉眠自昔遺臭甘百世流芳故自經千年我來
吊古君識取惡詩不用人間傳

滄浪亭詩寄牧仲中丞

王士禛阮亭

我昔萬里赴秦蜀書來邀賦滄浪亭喉間有語不敢吐六一妙句通仙靈曲江
樊川飽游歷石鼈谷水何清冷百花潭上花照眼東湖鳳翔坡公喜雨亭在其上菡萏千娉
婷東溪西溪夾明鏡中有萬竹森烟汀華州即鄭縣亭子滄浪南望渺天末恨無羽翮
排青冥歸來八載一彈指臥遊往往尋圖經高林翠阜尙窈窕紅蕖綠浪鋪丹
青盤山僧來見畫本使我遠望空吟屐子美有語即吾語擬來隨汝腰笻簪蘇子

美詩擬來隨爾帶答

滄浪亭新志

卷三 集詩

七

題滄浪高話卷示拙庵禪師

一勺滄浪水清如阿耨池高僧偶飛錫刺史復能詩翡翠簾垂處鷓鴣香定時
飄然離墨去還識舊茅茨

滄浪亭爲牧仲中丞作

朱彝尊竹垞

滄浪有遺亭勝跡今始到疎籬六枳榘小徑一僧導古牆聳寺樓暗水接官漕
怪石長差肩平林或妨帽因而詣北碕歷歷見房奧石枰雖無存宋毛珣滄浪亭詩日暮客歸園館閉鷺鷥飛上石基盤自汪子美故物惟石枰存草庵猶可造中丞吾老友山水敦夙好於焉翦榛
芩復此濬潭隩暇日攜賓僚曾不擁牌纛春留露輞駐暑便接離倒畚田課耕
稼浦禽恣啄菹游觀民胥悅豈弟神所勞湖州謫司馬賦才本雄鷲詩逼梅歐
陽文亦師訓誥賢相所館甥孔壬生嫉媚舉事偶不慎衆口逞狂譟故紙錢區
區乃誣名士盜茲事近千年識者尙憤懣哲人貴自勝林泉遂遐蹈南陽招不
去止用尺書報雜花修竹間風月任嘲傲斯人洵可懷曠世我心憚竭來謁祠
屋思以渚蘋芼落景谿橋還商飈遠吹滂

雨後遊滄浪亭懷古作

邵長蘅子湘

清曉臨高亭亭高俯木杪霽景澄川原林霏散煙鳥隔城三四峯空翠濃可掃
僧扉扣始開花木紛碎窳浦荷涼斂馥石徑濕霑草臺樹閱古今蘇梅骨已槁
千載亦虛名彭殤孰壽夭迴策度溪橋漁唱前溪宵

秋曉登滄浪亭

顧貞觀梁汾

初日上東南林亭空宿翳草香珠露重的礫侵衣被唱杳曲池菱吟餘小山桂
猶聞遺翰墨但惜沈碑碣望古情已深懷賢感亦係絲來澹蕩人別作流傳計
翕絕賤原嘗虛徐狎莊惠誰陪飛蓋遊屬和高文麗

獨遊滄浪亭

王 畿孟穀

過橋饒勝概石磴閱灣環亭子愜獨往高風如可攀沿流攢碧樹近郭出青山
欲識滄浪趣行歌杳靄間

自勝軒中坐如乘舴舻舟落花紛檻外老樹壓牆頭點綴江山麗鋪陳水石幽
梅園更何許述作好同遊

滄浪亭新志

卷三 集詩

八

滄浪亭

王 原令貽

一區林水渺風煙獨往城東蘭若邊直以詩翁開大府故教遺跡起前賢虛亭
曲榭長懷古柳眼花鬚共占年莫漫來遊矜勝賞明時逋客最相憐

滄浪雜詩

王式丹方若

滄浪亭

喚起滄浪夢重來上石亭依然臨水碧特地倚天青老樹密垂幕層峯遙列屏
風流有酬和莫更恨凋零

子美滄浪詩有
詩社凋零之句

自勝軒

擇地宜冲曠小軒窅窳中一灣依淺渚三面引清風笑閱猶多事形骸本自空
臞肥期戰勝此意古人同

子美滄浪亭記曰安於冲曠不與衆驅又曰形骸
既適則神不煩又曰笑閱萬古尙未能忘其所寓

觀魚處

行到觀魚處澄澄洗我心浮沈無定影澹澹有微音風颭藕花落煙籠溪水深
濠梁何必遠此樂一爲尋

步碕

騎入定不可堵筇徐步宜故應幽處好未許外間知宛委蘚花路橫斜梅樹枝
迴廊方寂寂嘯鳥夕陽時子美句云不可騎入步是宜

石枰精舍

石上一枰冷依稀似昔年未須論黑白且與賦方圓藥院滋新雨花欄罨晚煙
就中多古意一一見詩篇壁上多夫子題句

蘇學士祠

范杜慚功業歐梅暢歌窠含終古在名起後賢多俎豆竹梧徑文章雲水窟
闡幽同不朽碑版照山河

春日遊滄浪亭觀牡丹聽澄照上人琴

吳士玉荆山

曉風吹宿霧晴光搖蔚藍煙草萋正碧呢喃燕舞檐花事逢穀雨幽興追城南
散步向滄浪同遊客二三水邊映紅妝竹外颺青帘略約度曲折一徑登巉巖
高亭俯空闊淥淨遙相涵悠然西南望秀色挹層嵐逶迤循步碕堂宇肅觀瞻
滄浪亭新志 卷三 集詩 九

石枰入精舍奇葩媚幽壙綺霞深有態皚雪脂粉嫌絕豔如玉奴卯酒倚半酣
傳從洛下來花譜昔未諳斯遊頗快意獲陪青門髯子况聞穎師琴能使俗韻
砭古音發奇弄詩老間清談冷然忘身世欲去還少淹

滄浪亭集唐

王 穀 椒 卻

洛陽自古多才子徐疑聲價如今滿日邊羅聞道公餘多攬勝李每逢魚鳥即依
然趙暇南天任重同分陝李不似為官似散仙宋慶茂苑綺羅佳麗地白居昔人

遺蹟徧山川一樽前多暇更懷古楊不矜軒冕窮林泉白居作日韓家後園裏
籍更無人跡有苔錢韓僅有客有客字子美甫新詞宛轉遞相傳劉禹功勳碑碣

今何在胡曾臺榭荒涼七百年白社未殘追往事顧況時時閑步賞風煙劉禹門
閒多有投文客羅醉裏清吟勝管絃白居暫續古觀存梗概顧不隨流俗問媼

妍丹邱閨門柳色煙中遠張籍十萬人家如洞天許吳苑四時風景好白居就中野
趣在西徧劉禹軒窗簾幙皆如舊白居思結空門香火緣白居看花臨水心無

事劉禹不妨金地禮青蓮貫自歎曾為折腰吏張籍江月隨人處處圓溫庭如何

躡得蘇君跡元相招一和白雲篇元廣平賦就才偏俊元江令文章媚蜀箋

兼劉時忻御李情尤切元方寸終朝似火燃劉濯纓何得向滄浪白居易夢魂

可以相周旋建知君不久歸鈞軸韓建禮舍香次第遷王卑散自知霄漢隔王建

更取前題改數聯鄭風流雅韻誰能和鄭只將歌頌拜車前司空曙

滄浪亭

趙南極壽者

舊時榛莽留遺址云是湖州長史居幸有歐梅生異代重依泉石置精廬人逢
勝日羣投足我仰高風每曳裾不為文章傳世遠園亭何限化邱墟

滄浪亭

高鳳翰西園

老去登臨感慨多浮雲影裏一高歌名王池館石空在居士清涼夢亦訛藥裏
隨人劇潦倒酒杯到手肯蹉跎世間清濁真難說欲濯滄浪可奈何

滄浪亭

石韞玉琢堂

地踞吳趨勝人因子美傳湖山偏近市風月不論錢草暗憐蟲語沙明羨鷺拳
何如漁父意清濁總隨緣

滄浪亭新志

卷三 集詩

十

柳陰垂釣圖為平湖王文題

春風吹動綠楊枝煙雨江南寄所思卻羨滄浪老漁父濯纓濯足總天倪

滄浪亭

黃 達上之

煙飛不斷濕藤蘿曲曲紅欄映綠波人在滄浪亭子上春風拂樹隔牆多

滄浪亭懷古

秦 儀鳳崗

蘇梅不復見林壑夕陽明一曲滄浪水千秋常自清竹光浮古砌花影落空枰
惆悵閒風月而今任客評

遊滄浪亭

陳景高筠珊

碧波三面環虛空紅闌幾曲圍當中江南自古佳麗地此亭尤覺窮天工憶昔
錢王舊池館自經納土歌場散花落華筵玉罌乾絮飛瑤席銀箏斷厥有詩人
待罪來買將水石起樓臺冰清玉潤虛傳譽其奈權臣網不開寂寂姑蘇城畔
路朝衣脫却鄰鷗鷺才子飄零感歲華美人顏色嗟遲暮轉眼光陰數百年詩
筒硯匣埋蒼煙鐘聲擊破繁華夢大雲庵字顏其前幾度淒涼聞梵唄佛家法

力由來大換却如來金粟身重修文士蘭亭會宋玉風流世少雙謂牧仲補天先生
妙手拓紗窗頻借勝友開蓬館不礙高僧樹寶幢寶幢蓬館依然在太息名賢
終不待春柳溪頭捲絮萍秋風澤畔拳蘭蕙我自當年辭春明罡風吹墮紅塵
行紅塵十丈不得息吳王台畔輸幽情嚴冬落木西風勁閒遊偶訪招提淨如
此歡場已寂寥但餘流水懸明鏡藩王名士總滄桑祇有禪門日月長蒼蘆陰
深連佛殿棕欄葉大映僧房那堪落拓孤遊客又向荒亭吊陳迹無數寒鴉繞
樹飛夕陽倒浸煙波宅

滄浪亭

嚴寅同甫

長史羈栖地來遊正夕曛孤亭仍近水世事久浮雲曲折尋苔徑蒼茫見鷺羣
隔溪是精舍隱隱暮鐘聞

重修滄浪亭紀事

梁章鉅菑林

修池帶回岡危亭出叢薄懷賢游遊釣撫蹟傷寥落日余往流憩塵纓思一濯
復此觀風來始遂披雲約前會再權吳桌皆欲修不果至是三至此願始成累土增坡陀憑基構臺閣

滄浪亭新志

卷二 集詩

十一

媚春雜桃李褒秋薦蘭若依依濠濮情超然契崇廓

雄藩建別館勢家起華岑不如一長史千秋主園林豈伊文采都流風感人心
進言嬰嫉媚貴志傷浮沈風月託歌嘯巖壑貞崎嶇祠堂創維昔胥蠻修自今
歐梅不可招何人同靜吟

建炎數名將韓王忠且武一解背卷軍遂與煙霞侶早騎湖上驢不臥亭邊虎
配食水仙王千年賽祠鼓我來南園春盈尊酌芳醕何處寒光堂瑤華久榛莽
平生所遊歷魂魄戀茲土兩山失飛虹神來颯風雨亭後舊有韓霸王祠亦重新之

奧區久蕪沒禪關掩林坳我朝商邱公懷古初經營丹椒互虧蔽淥水相涵滄
時攜賓從至古歡答承平因之維勝迹屢廢亦屢興煥新紀汝南長洲令許遇復舊

逢延陵

吳中丞存禮

天潢偉人至

覺羅中丞雅爾哈善

翠墨輝松局迨茲百十年歷歷存令名

甘棠果恃此鬱陶乎余情

輦路春更綠翠華記南來宸情樂山水睿藻輝池臺圖書重林壑

南巡盛典中有滄浪亭圖

邱垤成崔巍列朝汪濊恩沾被周九垓敬告吳父老樂利蒙滋培煌煌卹民意

亭左石刻有康熙年間御書膏雨足時農戶喜縣花
明處長官清聯語及乾隆年間御書江南潮災嘆天語光娥羲假山而真水

濯纓知屬誰勉實斯副名至教兼露雷乾隆年間御製題滄浪亭云假山真水
傍城闌又云不知誰是濯纓人又云寄

語游斯者勉
實善副名宜切位思凜敢言懷抱開憂樂孰後先煥然資雅才

吳趨土風嘉禮教越年代傳人間世出好事託圖績景賢義是取坊民道斯貴

拓地成堂皇瞻儀同展拜庶幾遊觀餘敬恭肅冠帶千載神同遊三楹地匪隘

高士樓突兀中丞祠暗藹共此滄浪清蘋蘩可羞菜五百名賢祠及伯鸞高士
樓皆新建宋中丞祠則仍

飾之
舊貫而

漫堂葺小志道足振風雅權輿略甄綜所存惜已寡名亭匪自今八百年上下

陳蹟迭盛衰舊聞錯眞假比來光景新勝流遞觴竿烟墨所驅使芝蘭動盈把

攀芳掇其英願以貽來者宣德仰昭回采風逮細瑣政餘丹黃陳屹屹每自寫

敢云補漏缺差堪免喬野新撰滄浪亭志首宸翰次記錄次祠廟次藝文
而終以雜綴分爲七卷較宋志增多十之五六

上日風日美旨酒陶嘉賓今情詎殊昔舊觀俄還新碧草披崇厓丹葩耀芳津

條風應和律萬物皆熙春茂林散棲翮澄波動遊鱗借以覽氓俗豈云懷隱淪

滄浪亭新志 卷三 集詩 十一

看山了公事愧余非其人用宋中丞重
修記中語百廢視所舉勉答茲邦民

重陽日重修滄浪亭落成謙集得詩

泥痕三度雪鴻留甫得今番暢敘幽佳日壺觴酬令節名流歌嘯擬浮邱水從

遠岸灣成港人趁斜陽影上樓勝踐自然清謙好肯教鐘鼓駭沙鷗

共聽楓林韶濩聲秋光正滿闔閭城清風明月原無價近水遙山倍有情出句
用歐

陽公語對句用蘇長
史語皆滄浪亭本事樂在憂先吾豈敢天從人願事方生朝來佳話傳吳下賀

九還兼誌落成吳郡圖經引吳越春秋云胥山
有賀九嶺即吳王賀重九地

偕朱蘭坡潘梧亭步入滄浪亭憩於南禪寺繼至者
五人

莫笑粗官少勝緣看山游寺亦翛然偷閒愛到停雲地望遠偏宜欲雪天嘉樹

陰中花在眼同人商量
補種梅花高山仰止石差肩五百名賢鐫石已竣
擬就亭左砌壁爲祠繪圖那得耕煙

手正好題詩賦八仙

對門樂園好園林先與梧亭訪蘭坡於
可園因邀同步步遊門外苔痕總共岑開徑敢言三益至登

樓齊記五噫吟擬於樓中奉祀
吾宗伯鸞先生茗甌丈室蕭寥味籤笈名山鬱律心南禪寺爲
白香山皮

藏文集 舊址 昔日歐梅今漫叟千秋相望幾知音

摹刻蘇子美留別王原叔詩蹟於滄浪亭

前年我葺蘇公亭今年我見蘇公書其人遠矣墨猶濕真宰回斡蛟龍驅濠州
長官共論謫贈詩慷慨情鬱紆酒食細故乃誣盜小人伺隙如潛狙當年名流
一網盡四海偪仄將安居不平五嶽起方寸腕底如挾神靈俱蘇公之集宋公
槩漫堂中丞曾刊蘇學士集藝林光價爭珍儲寶奎頌字惜滅沒崇文軒壁誰能摹片楮欸
來孰我貺百六十七圓驪珠上林花開淮月澗書評所見祇皮膚始知自勝沃
有得筆中之勁腴非枯王介州評山谷書勁在筆中集園收自矧玉後此卷先入汪
近藏桐城汪均之集園中苴林豈見蕉林殊卷前後有我宗焦棠芝主人更好事據竝不肯
私籤櫛以鶴易書亦韻絕千年墨妙歸中吳陳芝楣觀察以鶴從汪易得之
為摹石祠廡璧白玉如見肝腸敷詩用本墨緣契合光景會蒼松鱗甲飛庭隅

為苴林方伯題滄浪亭詩畫冊

程贊清定甫

蘇公留勝蹟幽興寄滄浪鑒此空亭迴因之引趣長窗虛涵遠照樹古納新涼

滄浪亭新志

卷三 集詩

十三

豈獨塵纓濯臨流足詠觴

簷帷欣暫駐羣頌使君賢睟貌忘瓜削平情禁蔓連白雲秋更爽明月照無偏

作畫追前哲蒼茫七百年

新修滄浪亭

滄浪之水何清漣舊址本系吳越錢湖州長史築亭始六一居士題詩篇曾聞
池館易數姓更七百年亭翼然斷礎零落埋野草荒榛蕪穢迷秋烟商邱重建
構宋桷三韓繼葺營樞枅住僧元普好事者丹青一幅寫河澗宋牧仲先生初修三韓吳中丞
繼葺住僧元普會繪圖記事年深蹟往易磨滅風流雲散疇垂憐我公屏藩莅茲土頌聲洋
溢騰郊廛政成臨眺愜幽賞鳩工不惜鶴俸捐石枰步碕工位置雜花修竹紛
嬾娟一邱一壑饒古趣半村半郭忘塵喧波光激灑繞檻曲水天一色涵澄鮮
吁嗟我公真大賢豈徒觴詠供流連濯纓取義仰奎藻以水為監民隱宣冰壺
朗澈絕塵翳湛然心跡在山泉斯亭得公益不朽勝概負邁天聖年

新修滄浪亭

吳廷琛棣華

喧喧闔閭城南偏稍清曠滄浪古勝地林阜遠可望繚垣臨清流晴淥縵春漲
所嗟漸墮懷古但愴恨傳聞吳越時豪帥始興剏基扃巨綿邈臺榭紛向背
湖山更主客第宅迭衰旺子美旅吳中奇境天所貺水竹曠明瑟壺觴寄疏放
始標滄浪名一洗塵俗狀雄圖久銷歇風雅亦彫喪琳宮襲故地鳥語答梵唱
誰與還舊觀遺蹟備采訪商邱重起廢興築工用壯梁君今繼美修復意始暢
昔年駐行臺廨宇幸依傍今茲治行省藩垣實保障崇祀禮前賢宣風示清尚
寄情濠濮間抗跡雲霄上文章暨政事後先相比况我昨登斯亭快若遊蓬閬
歐梅不可作餘韻尙豪宕喬木鬱青蒼澗波自溶漾清風與明月千載故無恙
後來還視今浩歌一俯仰

九月二日偕蘭波雲汀同遊滄浪亭

卓秉恬海帆

身閒放眼讀奇書校理當年此結廬風雅况能超將相天機時復見禽魚石亭
就水花光淡野蔓盤窗日影虛路轉坡陀同散步高林翠阜畫難如

倚北杠南際曉過徑開三益暢懷多循廊細讀前賢記倚樹閒聽孺子歌勝賞

滄浪亭新志 卷三 集詩

十四

情移風月地佳時興寄水雲窩憐才曠代逢知己培葺斯亭永不磨

重陽日重修滄浪亭落成

滄浪亭子到今留城市山林引興幽遺跡每懷蘇長史勝情堪繼宋商邱百千
年後餘嘉樹五六人來聚小樓政暇快逢佳日至趨陪此念許間鷗

昨霄聽徹雨聲聲今日晴光却滿城伴客黃花能遠俗照人碧水亦含情開尊
恰值重陽節入座多招同歲生好爲滄浪增故實丁年九日此亭成

遊滄浪亭憩南禪寺和荳林韻

陶 澍雲汀

幾度偕遊結勝緣謝公雙屐更悠然放衙便動觀魚興載酒還如賞菊天

重九日諸

君讌集於此 石壁疏林供醉眼小橋流水寫吟肩却教滿郡猜傳遍道是蓬萊島上

仙

天然圖畫好園林水色嵐光共一岑勝地合教名士占新聲重聽大羅吟邀來
櫻笠皆仙侶種到梅花是素心今古因緣誰悟得南禪寺裏晚鐘音

滄浪亭印心石屋

不借生公石滄浪印此心金閭詩屋在萬綠結成陰

新修滄浪亭

亭樹立清森水石互縈帶雖處市闌中宛在煙霞外訪古迹斯留選勝地尤最
一時賢豪居千載遊人慨緬昔濯纓子寄迹遠塵械已無仕宦羈何有升沈介
惟餘風月情長此詩境界前輩屢經營吾儕復攘刈殘枰覽小山曲檻俯寒瀨
彷彿濠梁間觀魚意微會當年六飛駐舜目寄遐睎同樂及斯民至今瞻翠蓋
側聞吳兒歌幸時正康泰幅巾偶一來聚觀雜者艾使君爲此圖豈但紀興廢
試聽滄浪吟衢謠亦天籟

新修滄浪亭詩呈茵林方伯

朱 珩蘭坡

昔者至吳門屢過滄浪亭湖州長史留勝跡記勒牧仲書徵明今者至吳門亭
勢已遷改頽垣敗瓦希遊蹤祇剩青青蘚堦在回頭卅載如雲煙况更遠溯元
明前巍峨樹石幸無恙何人肯結騷壇緣茵林方伯吾舊識敷政及民戴德
慨焉復古新其基惟恐名流氣衰息餘事繪圖篆刻詩丹牘重整三公祠韓王
滄浪亭新志 卷三 集詩 十五

大帥宋大府乃與謫吏相肩差始知士貴立身有本末奚必富貴喧當時吁嗟
僉壬善謠詠鬻紙無多坐淪落雖然泌水棲遲差亦樂窮途尙得四萬錢恰俾
園池給工作澄波翠幹交光輝掉艇獨出時忘歸竭來曠世動輿感猶欲撰志
傳芳徽時輯滄浪小志君不見商邱先長樂後功共蘇台垂永久此間鷗鳥馴招爾當
良友仲宣寂寞愧依人簪菊聊期醉杯酒移家近住亭之傍願熱一瓣爐中香
題詩未到殊歐陽似君經營專我惠容我嘯咏菴鱸鄉濯纓濯足無不可急乘
深夜月夕拍手歌滄浪

滄浪亭對雪用坡公清虛堂韻寄懷蔣澹懷曹良甫並簡朱西生沈式如

趙 函良甫

世尊撒盡恆河沙奇疆怪樹紛排衙蓬婆一支落虛牖吉貝千頃吹空花破除
諸相得淨界點綴荒野成仙家昔與諸君轟飲處石棋盤上啼寒鴉鷺鷥飛上石棋盤宋
毛羽滄浪亭句老梅凌兢白封幹噤瘁綠萼慳紅葩此時惜無錢四萬買斷煥館烹團
茶曹君濟南蔣邗上歲宴宜聽回颿搗城東朱沈住對宇著書矻矻勤搜爬我

獨衝寒此登眺側身涵洞徒咨嗟詩成先以獻子美空有意氣凌青霞

憩滄浪亭寄懷梁茵林方伯用漁洋寄牧仲中丞滄浪亭詩韻二首

商邱先生宦遊地榛莽孰翦滄浪亭茶寮餅肆紛割據祇餘斗室棲詩靈梁公

秉節宋公後愛此一掬波清冷幽阜危椅置妥貼疎花高柳交娉婷更於水畔

起平榭綠疇遠接紅鳧汀吳賢五百陪寓客子美亦堪慰杳冥方伯刻吳中名賢五百像於祠

壁羲皇擬選北窗夢濠濮宜誦南華經賤子浪遊不稱意十載不蹋園蕪青歸

來濯纓兼濯足空歎病鶴寒鈴屢豈知公又賦歸去使我何處提笞箸我來隨爾帶笞

美笞子

憶昔讀公藤館詩平山堂側花飛時閩中詩法石倉後併力乃並韓蘇馳雲山

古音協韶濩廊廟正色賡皋夔胡然一朝解組去如凜裳瓶居井眉我曾著屐

遊武夷飽看灘石生淪漪崇安以南灘益峻一船如紙任所之紙船鐵稍公閱諺也凝翠

閣邊三載住山圍柳子成囚纍余客延平觀察署三載暨就楓亭啖荔子因過困關浮竹

碕我行不見靈峯頂左旗右鼓山參差方伯舊居在長樂之靈峯公今還山伴猿鶴腰間安

滄浪亭新志 卷二 集詩

用金魚爲鳥石新居似足下三分水竹揩瑠瓊縱橫花木稱心發歷落珠璣信

手揮角巾重見周與鄭宋鄭穆周希孟皆閩名臣同時致仕能令邱壑回春姿部民仰首望南極

濡筆請書三至碑

爲茵林先生圖滄浪亭册既成徵詩盈卷重命題句復成是篇

孫義鈞子和

風月無今昔千載遙贈投亭館卽故址琴觴有前修豪闊瀟經始嬾主如遞郵

危磴繡苔蘚喬柯偃龍虬頽垣繚叢薄蒼鬱生涼秋止永芳躅慕孰能華炤留

使君日按郡此焉駐輕輜林渙羅廣闊漁榔答鳴騶張組階鶴馴披牘庭草絲

因搢謝公笏頗拏李膺舟衙散赴冲眷地寂愜冥搜朱軒盛經過會賞迺寡儔

皇華甄輿頌惠政嫩且優民隱燭纖細涵鑑澄清流展如采土風攬奇肇偏陬

郡西湖山美寥泐瑩吟眸願廣濯纓什終嗣鏡水遊

題滄浪亭圖

吳信中謫人

風月長千古輝光繡服來扶輪新著作垂釣舊池臺桂楫勞相訪蓬門惜未開

公枉過關 異時想嘉樹詩話軼歐梅
於展待

題滄浪亭圖

鈕樹玉匪石

滄浪傳舊蹟千載有知音地待名賢重圖成勝概深詩情餘愷悌畫格想蕭森
他日論清濁臨流試一吟

題滄浪亭圖

郭 慶頻伽

危亭古木尚蒼然懷古追思老集賢世往園林須作主官清風月不論錢方枰
尚認彈碁石小杓時分糞茗泉便與吳人成故事他年地志好同傳

題滄浪亭圖

阮 元芸臺

滄浪水石半蒼苔權把蘇亭作外臺好是訟庭人散後一編閒對菊花開

題滄浪亭圖

蔣因培伯生

湖州長史舊園亭僕指章韓一再經龔明之云全家舊與章莊敏各故紙盡誣
名士盜新圖重乞草堂靈千年老樹分棠蔭三面清波閱使星想見棋枰閒算

滄浪亭新志

毛翊詩曰暮客歸園館閉鸞鸞飛上
石棋盤自注子美故物惟石枰存

卷二 集詩

十七

題滄浪亭圖

吳慈鶴巢松

清風與明月未肯游朱門非抱九仙骨邱壑詎所敦滄浪一灣水名以子美存
荒寒七百載茲此繡斧尊先生宏開濟餘事能雄文隻手障淮海黃流縮崑崙
棠陰昨聽訟肺石無冤民不聞鞭扑施新詩清且溫爬梳出嘉樹洗刷撐雲根
泛以無心舟招彼離岫雲青山喜公來競獻笑與顰終日不肯去相對如弟昆
禽鳥喜公來和鳴送朝昏草木亦忻暢雖秋意如春我本部下民未能飲公醕
長謠出肺腑字字皆天真終看把齋鉞政暇理角巾余亦荷簔歸從公垂半綸

滄浪亭

陸 鼎子調

泉石母言沽價微柳州文字學人稀得安才子迴翔步幸中讒夫黨伐機蘿徑
霜空無鶴毳莎汀水落有魚衣知他故紙爲何物獨看秋煙隴上飛

滄浪亭

黃國培晏君

駐蓋幾時來北渚少陵宴歷下亭詩云東藩駐皂蓋北渚濯纓今日到滄浪水連
柳岸流逾碧天入葭林色更蒼童子歌成音嫋嫋尙書初對影堂堂誰人結構

亭伊始古碣無言臥夕陽

滄浪亭

金 蘭子春

城市擅幽勝彎環十畝塘孤亭幾興廢流水自滄浪庭竹夏涼雨澗花然夕陽徘徊未能去得句寫清防

溪上

釋祖觀覺阿

一曲滄浪在釣磯溪邊行樂淡忘歸花明遠水魚爭唼葉落空林鳥共飛歲熟喜嘗香稻飯秋涼早製木棉衣百年多少乘除事細驗人情合掩扉

滄浪亭

錢 辰秋潭

獨坐觀魚樂滄浪水正清忽添垂釣意漫動濯纓情一代風騷客千秋仕宦名碁枰空世局不著與誰爭

秋晚滄浪亭小步

張 忻敏齋

滄浪亭外共尋詩一片煙雲入畫宜水漫池塘人跡斷風搏林壑鳥巢欵周遭綠意圍蓮葉咫尺紅塵隔柳枝歸去柴門聞笑語秋鐙醉月夜眠遲

滄浪亭新志

卷三 集詩

十八

遊滄浪亭 并序

袁學瀾文綺

滄浪舊跡自宋綿津興復之後迄庚申變後僅成童山瓦礫而已自癸秋郡僚興修裝點樓臺一新耳目至乙春始克歲功爲近日園林之冠上巳日挈眷重遊爲題四律以記遊蹟

得水園林活滄浪勝景多雙橋明鏡夾三月繡裙過名節傳青史亭台映綠波無邊風月好愁緒足消磨

翊運傳堂構明窗四面開公卿留翰墨士女擁香埃詩酒娛閒日勳名付劫灰鶯花隨世換風雅屬蘇梅

面水層軒啓蘋洲四望通觴流荷檻月權轉錦帆風七十鴛行列東西魚戲同江南採蓮曲吳語最能工

獨上危亭望湖山入座收浮雲觀世變遠翠見城頭蔬嫩僧攜鑪茶香客泛甌雲庵清曠地茅屋佛龕留

園中新開古大雲庵有僧月潭築茅屋五楹灌園其中

滄浪閒眺

再遊

月白天宇碧風吹天地靈我亦有靈性超然同忘形乾坤理可觀寂寂無臭聲
萬法從此出吾乃悟此生

滄浪口號

野寺村橋六七里城南風景看如此垂楊餘綠晚楓丹新月初黃暮天紫
以滄浪亭石刻五百名賢畫象分贈朱經田中丞賸之以詩

陳夔龍筱石

一水盈盈送客船濯纓清到出山泉贈君五百名賢象位業期君邁昔賢

二月二十九日與朱蝦眉孝廉斯華遊滄浪亭

傅振海曉淵

滄浪一曲水雲深子美高風直到今大有陶然亭上意江南城市亦山林

京師陶然

亭有城市山林額

滄浪書感集吳梅村句

彷彿是柴桑空階落葉黃蕭條書一卷不肯負滄浪

滄浪亭新志

卷三 集詩

十九

滄浪雜詠

憶昔南軒未許遊羨他居士福頻修我今也向南軒住可有遊人羨我否
莫怪先生不出游滄浪風景勝瀛洲憑君細數吳門裏更有林亭似此否
一曲虹橋景最幽沿堤鎮日客來游就中有箇持竿者劃破青萍下釣鈎
晴天偏少雨偏多添得城南水滿河雨後忽驚窗外樹風吹餘滴響池荷

秋日由滄浪移寓可園

志局初來正賞荷滄浪已住兩年多今朝仍向滄浪住笑指南軒隔一河

吳縣志

局原設滄浪亭南軒今移可園僅隔一水

一樣南園別有春池亭曲折淨無塵菊花香處蓉花豔似此秋光最可人

滄浪亭

吳俊卿昌碩

白鶴冲霄舞黃鸝坐樹鳴石欹亭子破山鏟夕陽平中酒詩腸活臨流病眼明
胸無塵一點底事濯吾纓

曉步滄浪亭

滄浪亭向曉星斗碧虛繁月倩柳絲繁露隨荷葉翻樂輸魚得計爛笑鶴棲樊
自賞江南客狂歌又一番

題滄浪亭寄傲圖

李寶章穀宜

人生誇好遊何能遍五嶽居此城市中能得好邱壑佳處經營之透迤更相屬
落落得長松娟娟此修竹可以建樓臺可以結廬屋可以石題詩可以觴流曲
水面泛白鷗可以棲黃鵠但知泉水清那知泉水濁

秋晚重過滄浪亭坐雨有作

周麟書迦陵

蕭條秋氣逼牕紗獨自憑欄望眼賒出岫白雲堆作絮墮林紅葉爛於花濯纓
濯足人何在聽雨聽風日又斜我本滄浪亭下客十年回首倍堪嗟

雨中過滄浪亭

絕壑沈沈纔半畝孤亭莽莽已千年重來近水遙山地正值斜風細雨天

滄浪亭賦

潘 耒稼堂

伊吳城之雄關苞萬井與千街市塵翼其鱗次官閣煥乎雲排惟南城爲空曠

滄浪亭新志

卷三 集詩

二十一

有水木之清佳山浮青而當戶水瀉白以縈階廓平疇之百頃忽心舒而目開
推囂塵而頓遠延秀爽以乍來爰有巍亭冠乎高阜仰披煙霄旁帶林藪繡野
襟前曲池環後豁達軒堂疏通戶牖萬象森其畢呈諸奇伏而咸剖茲惟滄浪
之亭勝獨超而無耦在昔子美爲宋名賢負匡時之材略思補袞而濟川遭排
擠於羣枉鬱忠貞而不宣厭洛下之喧雜樂吳風之清妍遠移家而卜築聊消
遙以窮年悅此奧區有竹有水草樹豐茸川原演迤密邇宮牆隔絕巷市不山
而靜深非谷而宛委乃購隙地乃營亭臺扁舟草屨容與徘徊魚鳥相狎麋鹿
爲儕忘窮通而遺毀譽信賢達之高懷茲其所以誇耀於圖記稱述於歐梅也
五百年來陵遷谷變免走荒阡蛇游枯澗燈青報賽之祠鐘冷伽陀之院嗟草
沒而苔封剩遺踪其如綫猗歟宋公名世宗臣柱石龍鸞萃於一身撫東南之
重地煦寒谷於陽春民無隱而不恤俗無遠而弗詢既政通而人和時求舊以
訪古表前修之墜言存哲士之遺矩陟層岡而賞心想高賢其如覩思濯纓於
清流眷嘉名之足取爰作新亭廓是舊墟因高壘石就下浚渠依窪隆之曲折

映竹樹之扶疏闢華堂於木末啓別館於巖隅雜植桐柳羅生芙蓉安翔野鳥
泳躍鯨魚縱物情之暢遂來天籟之虛徐想濠濮其不遠與習池而何殊公乃
於機務餘閒來遊來眺集賓朋使授簡援琴觴而寄傲理東山之雅詠發南樓
之清嘯政以暇而彌精思以超而愈妙齊羊杜之高蹤同白蘇之逸調抑且肩
鏑不施藩籬不設公諸士民餐芳沐潔懷賢者薦夫蘋蘩訪古者誦夫碑碣牛
鐸得應黃鐘巴歌許賡白雪固將使昔賢高致標映江山而文采風流照耀不
絕也載稽吳會夙富園池若辟疆之繆松怪石任晦之曲沼層陂南園之峯巒
巧麗東墅之卉木珍奇是皆豪家之所締構貴師之所指麾既已灰飛煙滅光
影無遺卽茲亭之墟主亦屢易經始於王孫落成於貴戚章相得之而增華韓
王有之而加闢然無有舉其始名尋其蹤跡者惟子美也官不過長史身不在
巖廊爲羈窮之遷客暫僑寓於江鄉徒以英風豪氣磊落軒昂直聲振於朝列
翰藻播於遐荒遇雖窮而名顯身雖困而道光故人撫遺墟而增感考陳蹟
而表揚豈非豪華聲利如過隙而文章氣節爲久長也哉江湖散人尊鱸逸民

去金門其已遠與泉石而相親企先賢之逸軌歎當年之數屯忽光顯於此日
類蠖屈而龍伸曠百世而相契信知己之有真感高誼之難覲聊寫心於斯文